

On l' lomeut Djan l' lapin, co frêch drî sès-orèyes ;  
Dau fin fond di s' tèréye, dispû qu' i s'è sovint,  
Il ètind l' minme tchanson, one vwès qu'a byin l'aîr grèye.  
I n'a jamais conu qu'one mère sote di s' raupin  
Què l'a gâté, cové, abandonéye pa s'-t-ome ;  
Disfindu d' moussi foû si longtims qu' 'l a tété :  
« Si vos vos-embêtez, gn-a qu'à pèter on some ! »  
On djoû, pupont d' moman, l' tchèsseû l'aveut touwé !  
Nosse galiârd, nin trop sûr, risquéye on-ouy à l'uch ,  
Èt taper s' vûwe à gauche, à drwète, bin décidé  
À r'trover l' grand tchanteû, si bin catchî qu'i fuche,  
Po lî dire qu'i l'admire, qu'i n' s'è saureut passer !  
Come s'i l'aureut sintu, l'ôte lance si-t-ârguèdène  
Avou s' grosse vwès d' ténôr, qui nosse Djan a r'conu.  
I lî chone qui ça vint dès bouchnis' ou dès spènes :  
C'èst d'à l'copète di l'aube qu'i tchante, sins voler djus !  
« On direut veûy on maïsse, bin à s'-t-auje, è purète !  
Mins mi, qui mousse foû d' tête, dji n' î vou pus raler !  
Dj' inmereûve co mia moru, î lèyî mès osètes,  
Dji vou viker come vos putôt qui d' m'ètèrer !  
Vos vèyoze lon, di-d'là, vos-avoz d' l'èspéryince !  
Èst ç' qui vos m' dirîz bin comint qu'i m' faureut fé  
Po profiter dèl vîye come vos ? C'èst qui, li syince,  
Gn-a dès cis qu'enn'ont d' trop, dji m'enn'a d'vu passer !  
Di d'ci, en lèvant m' tièsse, dji veu li rwè do monde !  
Todi rîre èt tchanter, ni s' jamais trècasser !  
Waîtîz di m' fé plaîji, purdoz saquants sègondes ,  
Èspliquez m' comint fé por mi-z-è profiter !  
– Dji su dins mès bons djoûs, vos-avoz co dèl chance !  
Dji m' va rècompinser vosse façon d' m'atauchî ;  
Choûtez ç' qui dj' vos va dire, èt fioz-è bone ûsance :  
Arindjîz on bia nid bin tchôd po-z-î sokî !  
I-gn-a là one bèle place, jusse astok à l'urèye :  
Sitaurez-î dès yèbes èt dès fouyes qu'ont sètchi  
Vos-î pôroz passer vos nêts èt vos djoûrnéyes  
À tûzer, balziner, tènawète mi r'mêrci. »  
Li lapin l'a choûté, èt l' lèd'mwin, al vièspréye,  
Li r'naud, come tos lès djoûs, tot fiant s' toû l'a scroté !  
Atincion aus mèssadjes adrèssîs à l' troupléye  
Qui vègnenut d'à l' copète, d'onk qu'èst bin wôt placé !

Albert Delvaux  
Sètîmbe 2013

Grèye : frêle  
Lèyî sès osètes : mourir  
Raupin : gamin  
Ârguèdène : ritournelle